

Oqaluuserisassanut nassuiaat.

(Inatsisartut Siulittaasuut)

Siulittaasoqarfik ullumi ullup ingerlanerani Naalakkersuisunut ilaasortanit sisamanit Naalakkersuisunut ilaasortatut atuuffimminnit tunuarnissaminnik kissaataannik tigusaqarpoq. Taamatut kissaateqarneq Inatsisartunit akuerineqartussaavoq, tamanna pillugu suleriaatsimi § 57-imi aalajangersakkat naapertorlugit. Periarfissatut allatut Naalakkersuisunut ilaasortaq Inatsisartunit nalunaaruteqarsinnaavoq Naalakkersuisunut ilaasortaq arlallilluunniit atuuffiinit atuukkunnaarsillugit, Inatsisartut Naalakkersuisullu pillugit Inatsisartut inatsisaanni § 23, imm. 2-mi tamanna pillugu aalajangersakkat naapertorlugit.

Inatsisartut suli periarfissaqarsimangillat taamatut kissaateqarnerit pineqartut oqaluuserinissaannut. Taamatuttaaq Siulittaasoqarfik suli pisortatigoortumik nalunaarfigineqarsimangilaq pineqartut Naalakkersuisut Siulittaasuannit atuuffimminnit atuukkunnaarsinneqarnerannik. Taamaattumik pineqartut suli Naalakkersuisunut ilaasortaapput, inatsisini allassimasut maleqqissaassagaanni.

Naalakkersuisunut ilaasortap Siverth K. Heilmannip Inatsisartunit sulinngiffeqarnermi ingerlaannaq atorunnaarsinneqarnissaanik qinnuteqarpoq. Tamatuma malitsigisaanik sinniisussatut ataatsimiigiaqquneqarsimasoq Knud Kristiansen ingerlaannaq tassangga tunuarpoq.

Naalakkersuisunut ilaasortaq Steen Lyngé nalunaaruteqarpoq Naalakkersuisunit tunuarenermi kingorna Inatsisartunit sulinngiffeqarnini attatiinnarniarlugu. Inatsisartut Siulittaasoqarfiata aalajangerpaa qinnuteqaat taanna akuerineqarsinnaanngitsoq, tassami Inatsisartunit sulinngiffeqarniarneq akuerineqarnikummat pineqartup Naalakkersuisunut ilaasortatut atuuffimmik isumaginnissinnaanissaa siunertarlugu. Tamatuma malitsigisaanik sinniisussatut ataatsimiigiaqquneqarsimasoq Gerhardt Petersen tassangga tunuassaaq Steen Lyngé Naalakkersuisunit tunuarnera inatsisit malillugit akuerineqarpat.

Naalakkersuisunut ilaasortaq Jens Erik Kirkegaard nalunaaruteqarpoq Naalakkersuisunut ilaasortatut tunuarnermi saniatigut aamma Inatsisartunit tunuarnissani kissaatigalugu. Suleriaatsitsinni § 56 malillugu ataatsimiinnerit ingerlaneranni taamatut qinnuteqarnerit Inatsisartut namminneq aalajangertartussaavaat. Inatsisartut apequt suli isummerfiginngilaat taamaattumillu Jens Erik Kirkegaard suli Naalakkersuisunut ilaasortaalluni allatut aalajangertoqarnissaata tungaanut. Jens Erik Kirkegaard Naalakkersuisunut ilaasortaanermini Inatsisartunit sulinngiffeqarpoq, unnummulli nalunaarutigalugu Inatsisartunit sulinngiffeqarnerup atorunnaarsinneqarnissaa kissaatigalugu. Tamatuma malitsigisaanik

sinniisussatut ataatsimiigiquneqarsimasoq Saxtorph Didriksen ingerlaannaq tassannga tunuarpoq.

Naalakkersuisunut ilaasortaq Nick Nielsen Inatsisartunut ilaasortaanngilaq. Taamaattumik Naalakkersuisunut ilaasortatut atuuffimminit tunuarnera Inatsisartut aalajangiisinnaassuseqarnerannut sunniuteqarnaviannngilaq.

Isumaqartoqarporli pissutsit ullumikkut ilerneranni Inatsisartut sukumiinerusumik isummernissaat pisariaqanngitsoq, tassami Siulittaasoqarfik ualimut kingusissukkut Naalakkersuisut siulittaasorigallagaannit qinnuteqaammik tigusaqarmat Inatsisartunut immikkut ittumik qinersisitsinissaq pillugu inatsisissatut siunnersuummik Inatsisartunut saqqummiussinissamik. Siulittaasoqarfiup aalajangerpaa qinnuteqaat akueriniarlugu. Siulittaasoqarfiup Suleriaatsimi § 41 tunngavigalugu aalajangerpaa inatsisissatut siunnersuut taanna malitsitullu inatsisissatut siunnersuutaajunnartut allat unnummut oqaluuserisassanut ilanngunneqassasut, ingerlaannartumillu tulleriissillugit siullermeerneqarlutik, aappassaaneerneqarlutillu pingajussaaneerneqassasut.

Taamaalilluni Naalakkersuisut inatsisissatut siunnersuutaat unnummut ataatsimiinnissatsinni, ukiakkut ataatsimiinnermi ingerlasumi taamaalilluni aamma ataatsimiiffiusumi kingullermi, kisiartaallutik oqaluuserisassaapput.

Taasisarnerit eqqarsaatigalugit unnummut ataatsimiinnermi ilaasortat uku isumaqatigiissuteqarput:

Anders Olsen, Siumut aamma Naaja Nathanielsen, Inuit Ataqatigiit.